




四川大學古籍整理研究所編

儒藏

史部
第二十三冊

四川大學出版社



四川大學古籍整理研究所 編

儒藏·史部

歷代學案

第十冊

四川大學出版社 二〇〇五年

江苏工业学院图书馆
藏书章

目錄

宋元學案補遺

六（卷七五至卷八九）

金生楊校點

邱進之審稿

.....

一



儒藏

目錄

宋元學案補遺卷七十五

絜齋學案補遺

呂陸門人

【補】正獻袁絜齋先生燮

梓材謹案、先生祭倪尚書思文云、某始以諸生、事公成均。又云、平生知己、如公實希。是倪齊齋固先生太學受知之師也。

梓材又案、袁清容書進修堂往還尺牘云、始、曾大父越公從

正獻公時、諸生從正獻公凡數百人。公教不及諸子、母夫人

戴氏手模顏魯公大字以教諸孫。又可見先生之家學淵源、

不獨前有賢父矣。

絜齋家塾書鈔

治安之時、危亂之萌已兆。漢宣帝渭上之朝、是年元后生成帝、新都篡漢已兆于極盛之時矣。無虞豈可不戒哉。

舜耕歷山之時、祇見厥父、惟知己之有罪、而不見父之爲頑、所以底豫、及其征苗也、自省未嘗有過、

而惟見苗民之作慝、所以逆命。至班師之後、誕敷文德、無異負罪、引慝之心、而遂格焉。滿損謙益、捷于影響、人心豈可以自滿哉。

王伯厚曰、仲虺之誥成湯、召公之訓武王、戒其滿而自矜也。齊桓服楚、魏武得荊州、唐莊宗取汴、皆以滿失之。

梓材謹案、四庫全書本永樂大典著錄絜齋家塾書鈔、提要稱其舉出陸象山。是編大旨在于發明本心、反覆引申、頗能暢其師說、而于帝王治迹、尤參酌古今、一一標舉其要領。王厚齋發明洛閩之學、多與金溪殊軌、然于絜齋所解微戒、無虞諸條、特採入困學紀聞中。蓋其理至足、則異趣者亦不能易也。

毛詩講義

詩三百、一言以蔽之、曰思無邪。蓋取其直己而發、粹然一出於正、風雅雖變、而思之無邪、則一而已矣。大序所謂禮義、即孔子所謂無邪也。



儒藏

梓材謹案、四庫全書本永樂大典編定絜齋毛詩經筵講義四卷、提要稱其中議論和平、頗得風人本旨、于振興恢復之事尤再三致意。如論式微篇、則極稱太王、勾踐轉弱為強、而貶黎侯無奮發之心。論揚之水篇、則謂平王柔弱為可憐。論黍離篇、則直以汴京宗廟官闕為言、皆深有合于獻納之義。胡氏作春秋傳、意主復讎、往往牽經以從己、而絜齋則因經文所有而推闡之、故理明詞達、無所矯揉、可謂能以古義資啓沃矣。

絜齋文集

古者大有爲之君、所以根源治道者、一言以蔽之曰、此心之精神而已。心之精神、洞徹無間、九州四海靡所不燭。故書曰光被四表格于上下、又曰帝光天之下、二帝之精神也。曰明明我祖、萬邦之君德日新、宣重光、三王之精神也。二帝三王、終日乾乾、自強不息、故能全此精神、以照臨天下、至于今仰之。今也雖有仁心仁聞、而大有爲之效未著。願

毋以寬裕溫柔自安、必以發強剛毅相濟、朝夕警策、不敢荒寧、以磨厲其精神、監觀往古、延訪英髦、以發揮其精神、日進而不止、常明而不昏、則流行發見、無非精神矣。昔我藝祖、當寓縣分裂之際、整齊乾坤、如再開闢。詩曰、周雖舊邦、其命維新。新者、精神之謂也。誠能以藝祖爲法、則我宋之維新、亦當常如創業之初。都官郎官上殿劄子

書曰、有言逆于汝心、必求諸道。有言遜于汝志、必求諸非道。此萬世人主聽言之法也。言雖忤意而合于道、斯忠言矣。言雖可喜而悖于理、斯不忠矣。

風俗無常、惟上所導。導之以正直、則人心皆趨于正直矣。導之以邪佞、則人心皆趨于邪佞矣。以上陳

人君宜納諫劄子

自古患無良將、不患無精兵。得良將以統率之、御之以道、束之以法、怯者可使勇、弱者可使強。省兵篇冗官之未省、冗兵之未汰、皆不可言政事。此蠹財

之大者。裕財篇

人生自有樂地。此心無愧。雖貧且賤。自有真樂。此心有慊。雖富且貴。不堪其憂。再乞歸田里狀

學以自得爲貴。學不自得。猶不學也。論語一書。多六經之所未嘗言。而孟氏一書。又多論語之所未嘗言。大聖大賢。豈故求異于人哉。得于心。發于言。不自知其爲異也。書贈傅正夫

口傳耳受。雖多奚爲。發憤力行。弗得弗措。過雖微而必改。善雖小而必爲。立志貴乎恢張。保德務在兢業。毫髮有疑。不可謂學。純明不貳。斯之謂盛。書贈

張伯常

士君子立于斯世。所以殊于衆人者。以其知道也。不學則不知道。不知道則無以爲人。跋滕君勿齋記後天下無心外之道。安有不根于心而可以言道者。直躬之直。申枨之剛。仲子之廉。鄉原之忠信。楊墨之仁義。皆不根諸心而已。韶州重修學記

射必破的。其藝始精。幾于的而不能中。則亦不精矣。惟道亦然。隱諸中心而安。質諸聖人而合。始可爲據依之地。微有差焉。於道歧矣。止善堂記

兢業之謂敬。敬則不欺故直。斷制之謂義。義則不屈故方。敬義立齋記

人之欲無窮。必求所以滿其欲。非道而取。何所不至。養小喪大。淪胥不仁不義之域。豈不哀哉。是亦樓

記

象山先生曰。學問之要。得其本心而已。心之本真。未嘗不善。有不善者。非其初然也。孟子嘗言之矣。鄉爲身死而不受。今爲宮室之美。妻妾之奉。所識窮乏者得我而爲之。此之謂失其本心。其言昭晰如是。刊象山文集序

漢儒雖不逮古。而師資之益。猶汲汲焉。故司馬談學天官于唐都。受易于楊何。習道論于黃子。夏侯勝既從始昌受尚書。又師事簡卿。又請業歐陽氏。



儒藏

蕭望之始事后蒼、復事白奇、又從夏侯勝問論語、禮服。所學皆非一師、宜其講習之精、見聞之廣也。

戴德甫墓志

【附錄】

公尉江陰、浙西大饑、提舉常平羅點選僚吏分任振卹、而以江陰屬公。公謂經理田野之政、自一保始、每保畫一圖、凡田疇、山水、道路、橋梁、寺觀之屬、靡不登載、而以民居分布其間。某治某業、丁口老幼、凡幾、悉附見之。會諸保爲一都之圖、合諸都爲一鄉之圖、又合諸鄉爲一縣之圖、可以正疆界、可以稽戶口、可以起徒役、可以備姦偷。凡按征發、爭訟、追胥之事、披圖一見可決。在田野爲保社、在軍旅爲伍法、韓信多多益辦、用是故也。公首以此爲荒政之要、由是民被實惠、而欺僞者無所容。

以太學正召。朱侍講及諸名儒已次第去國、未幾、趙丞相罷。公知必不爲時所容、然猶晨入學、延見

生徒、商榷理道。或謂諸生多上書議斥時事、不當誘進、公不爲變、迄以此論罷。

除禮侍、兼侍讀。公丐歸、至八九上、迄不之許。會三學諸生伏闕上疏、斥主和者之非、旣而全臺論列、乃併公以罷。太學諸生三百餘人祖餞都門外、且賦詩以別。公曰、乾道變化、各正性命、雷雨作解、草木甲坼、此吾志也。以直得名、豈其心哉。

公自少有志經濟之業、每謂爲學當以聖賢自期、仕宦當以將相自任、故其所講明者、由體而用、莫不兼綜。謂學不足以開物成務、則于儒者之職分爲有闕。

講道于家、以諸經、論、孟、大義警策學者、于書、禮記、論說尤詳。

公嘗言、所貴乎世家者、非必七葉珥貂如漢金、張八葉宰相如唐蕭氏、名位雖崇、而不能皆賢、何世之有。若東都之袁、楊二氏、氣脈聯屬、名德俱隆、則

可謂世祿矣。

趙野谷送絜齋倉使袁都官歸班詩曰、六轡按部
朝出關、郵鈴插羽夜趣還。詔字天飛紫泥濕、一點
郎星歸拱北。鄉來翻動大鰲魚、致君堯舜真須與。
金甌未啓請麾去、旋頒漢節登范車。先生有道出
洙泗、派分象山接洛水。振鐸重席闡聖傳、此心之
外無二理。先生有才輩伊周、胸襟百萬森戈矛。新
亭肯作楚囚泣、誓楫一念清神州。此行豈但蘭再
握、講帷欠公熙帝學。火城照空沙隄新、堂印押班
運籌幄。絜齋牆仞世龍門、瓣香夙昔鑽仰心。邑債
一了即歸耕、但當拭目天上新經綸。日與漁樵擊
壤歌太平。

眞西山書絜齋訓語曰、始出關、夜宿南山之招提、
詰旦、甫辨色、吏擊門以告曰、袁司業至矣。亟披衣
迎拜曰、先生何出之蚤耶。先生曰、此何時、而安寢
也。坐論世事、至于涕流。先生盛心、昭揭日月、今猶

赫赫也。

蒙齋創東塾、告絜齋祠堂祝文曰、肆我先公、體道
之元。推以淑人、訓語溫溫。光明本有、意動而昏。昏
去明復、照耀乾坤。四海歸慕、絜齋之門。矧伊一家、
昆弟子孫。愛及甥輩、罔間藩垣。

程洺水祭袁侍郎文曰、某蒙公之知、受公之教、最
爲隆異。歲在丙子、丁丑之交、某所寓舍實在旱河、
公時少監祕書也。日旰退省、歸塗經從、必蒙賜顧。
有若義理之訓、旣極詳明、至論當世之事、尤爲激
烈。且言自古聖賢有志當世、惟孟子尤爲有用之
才。其治家也、必曰深其耕、易其耨、五雞二彘、藝牆
下以桑、則家烏得不肥。爲國者能使商賈願出于
市、耕者願耕于野、仕者願立于朝、則國烏得而不
理。爲天下者必泣中國而撫四夷、則戎狄安得而
不服。有天下者猶運之掌、則天下烏得而不太平。
其氣直而勇、其言壯而明、蓋不惟其學深于孟子、



儒藏

而其資稟實似孟子也。使公而端委廟堂、則進賢黜不肖、內修政事、外攘戎狄、則如前四者之效、當必有可觀者。不然、假以期頤之年、卧之寂寥之濱、使之統斯道之盟、一諸儒之向、譬諸赤刀大璧、不必陳之明堂、而亦足爲清廟鎮。夫何不然、天嗇其祐、一疾不留、殄瘁之哀、實關邦國、安仰之歎、均起多士、蓋不止乎一人之私、一日之悲而已也。

劉後村挽袁侍郎詩曰、華髮始遭逢、其如道不同。可曾留孟叟、俄已罷申公。諫草多傳出、經疑盡解通。豈無南董氏、奮筆紀孤忠。

其二曰、遺誥兼新詁、同時至華門。龍髯先帝遠、鮐背幾公存。方恨三旌晚、俄驚一鑑昏。潸然關世道、不是哭私恩。

王厚齋跋先生答舒和仲書曰、昔子朱子有言、子思教人之法、以尊德性、道問學兩事爲用力之要。陸子靜所言專是尊德性、絜齋先生之學、陸子之

學也。觀其尺牘、皆勉學之要言、蓋尊德性實根本于學問、未嘗失于一偏、是亦朱子之意也。所謂但慕高遠、不覽古今、務爲高論、不在書策者、歲末俗之膏肓至深至切。所謂古人多識前言往行、日課一經一史、斯言也。學者當書紳銘几、晝誦夜思、尊所聞、行所知、可不勉歟。至于因晚楊梅之餽、推之于大才晚成、此格物之學、一草一木之理、必致其極。節或虧于晚學、或倦于耄、俛焉孳孳、不知年數之不足、尤當以自警。

梓材謹案、晚楊梅之說、厚齋先生所以自命也。語甚懇至、餘

補載深寧學案。

方虛谷跋絜齋年譜略曰、公所學、天地之心也。自有天地以來、聖此心也、賢此心也。自公之得諸師傳家授以來、象山此心也、慈湖此心也、絜齋此心也。必有事焉而勿正之心也、勿忘而又勿助長之心也。孩之知愛親也、長之知敬兄也、宗廟而欽也、

墟墓而哀也、即此所謂本然之心也。

黃南山先賢正獻袁先生贊曰、有鄞儒族、自高而玄、道隆正獻、裕後光前、笙鏞著述、天地其心、魯無君子、後學奚欽。

謝山句餘土音過柳亭訪袁正獻公絜齋書院詩、在昔樓評事、于此闢榛荆、中有袁光祿、實爲都講生、評事既徙居、光祿乃紹承、薪傳歷三世、碩儒大其聲、鳶飛而魚躍、此心共清明、由來小天地、胡爲常惺惺、精廬紛戶屨、至教多所成、敏者或自得、鈍者或涕零、嗣音有廣微、家學愈增呖、王道在尙書、聖學在孝經、瀕江幾楹屋、繁星耀太清、科舉日以盛、微言日以零、千里生民業、但爲溫飽營、西瞻鄞山塾、亦復沒蒿芳、原註云、正獻解尙書、正肅解孝經。

吳氏先緒

吳先生仁

吳仁字靜翁、世居海寧之臨溪、幼警敏嗜書、壯遊辟雍、一時師友皆海內英茂、異時余端禮、謝深甫當國、奇其才、欲以異恩畀之、辭焉、屬試屢卻、益卻益厲、晚彌篤、每語其子曰、學以經爲菑、史爲穫、決科之辭、抑末耳、平生爲辭章、有靜軒雜著、二子曰、光曰炎、程洺水集

絜齋講友

鄉貢林草廬先生肅

別見滄洲諸儒學案補遺

絜齋同調

文肅徐先生應龍

別見慈湖學案補遺

絜齋家學

縣丞袁先生樵

別見嶽麓諸儒學案補遺

袁先生任

袁任字信翁、鄞人、與正獻同曾祖、蒙齋父行也、官至處州兵馬鈐轄、祝釐崇禧觀、幼從正獻學、蒙齋稱其以材猷自負、而又能以儉約自持、蒙齋文集



儒藏

袁先生喬

袁喬字崇謙、絜齋長子。輯絜齋家塾書鈔、蓋錄其家庭所聞、至君爽而止。直齋書錄解題

【附錄】

蒙齋媿箴曰、天資正直、急義勇爲。先君子講說諸經、鈔錄傳後、炳然有耀。吾媿先長兄。

又絜齋家塾書鈔後序曰、伯兄天資純正、用志勤篤。嘗宰溧陽、視民猶子。邑人德之、惜未盡行所學耳。

【補】少卿袁晉齋先生肅

【附錄】

蒙齋媿箴曰、博學精識。^①克紹前聞。居考妣喪、各茹素。終三年、仕而見黜、屹無附麗。吾媿先次兄。

【補】正肅袁蒙齋先生甫

梓材謹案、先生蓋趙訥齋之婿、見下曹先生逢已傳。

雲濠謹案、宋史先生本傳云、有孝經說、孟子解、後省封駁、信

安志、江東荒政錄、防振錄、樂事錄及文集行世。

蒙齋文集

興教化者、不僅止于革面、善士習者、必當明其本心。降衷之良、秉彝之懿、凡民莫不皆然。況名之爲士、乃不知孝弟本良能、忠信非外鑠、縱由科舉以進身、莫識事君之大義、國家何賴于若人哉。知衢州

事奏狀

先君子嘗訓學者曰、立志貴乎恢張、保德莫如兢業。今世之士、往往卑近者之恢張之志、而俊邁者鮮兢業之誠。有能立大志、奮大勇、傑然立乎千萬人之上、而檢點此身、雖毫釐之間、微有過差、亦不苟恕、則恢張、兢業兩得之矣。送林德甫赴京學教授序

壞天下國家者、私意也。而惟一公字足以藥之。壞士大夫節義者、無羞惡之心也。而惟一恥字足以藥之。贈沈智甫序

古之學也粹、後之學也駁。古之學也實、後之學也

虛。古之學也務本、後之學也趨末。古其可復乎。道與天地準、萬世如一日也。明古之道、修古之教、是亦古而已矣。

有能傳先王之正統而與學者共之、陶冶作成、一歸于正、親正人、見正行、習正論、磨礱既久、日充日明、秉彝之良、油然而感發、孰得而禦之。

以上寧國府修學

記

省非難、常省爲難。曾子曰三省也、以魯。顏子亦足以發也、以愚。此魯非魯、此愚非愚、學者于此而省發焉、純純乎、孳孳乎、理融心悟、一以貫也、躬行實踐、默而識也。忠君孝親、本有良貴、仁宅義路、何莫由斯。志其基本、敬其輿也。誦讀則沃以膏液、嚴師畏友、則鍼砭藥石也。死生不貳、帝臨汝也。天下歸仁、物我無間也。

象山書院記

桑麻菽粟、舉世不以爲迂、以其能生我也。人非道不生、而舉世一聞談道、則以迂目之。道固在桑麻

菽粟外耶。

浮梁縣修學記

夫道一而已矣、學者各植門庭、將以自尊其師、師道不如是也。三代既遠、漢儒專門名家、破碎大道、自時厥後、紛紛藉藉、不能會于一。我皇朝大儒繼作、始克合百川而宗于海。中興以來、四先生身任道統之責、悉力主盟、凡修之身、行之家、用之國、推以淑諸後進、皆天理人彝、如桑麻穀粟、鑿鑿眞實、不可誣已。四先生無二道、而學者師承多異、于是藩牆立、畛域分、所謂切己之實學、忠君孝親之實心、經國濟世之實用、睽離乖隔、不能會歸有極、反甚于漢儒、可悲也夫。殊不思乾淳以來、四先生相爲後先、所以明義理、別正邪、羽翼吾道、果爲何事。弟子之尊其師、當先識其師之道、大本必正、大旨必明、則道在是矣。奚必于一話言之間、一去取之際、屑屑焉較短量長、以是爲能事哉。迹類而心殊、名同而實異、乃後學之大病、又豈可以類先生耶。



儒藏

若夫四先生之自相切磋，則固有不苟同者矣。正以道無終窮，學無止法，更相問辨，以求歸于一是之地。是乃從善服義之公心，尤非後學之所可輕議也。鄭縣學乾淳四先生祠記

瞻彼山兮，形若塊然。振古青青，發育無邊。靜乃如

此，妙不可傳。仁者默識，以永天年。仁者樂山銘

爲學如射，立志爲先。志在命中，鐵石可穿。企彼聖

哲，萬夫莫前。有志竟成，古語信然。立志箴

過何從生，不觀省故。提起精神，靡間朝暮。精神者

何。靈明天賦，惟是觀省，弗得弗措。一日得之，本來

素具，不以力索，無物可付。徹上徹下，綽乎有裕。觀省

箴贈桂伯順

忿從何起，反觀諸己。寂然本無，何怒何喜。波浪平

息，湛若止水。懲忿之要，如斯而已。懲忿箴

欲從何生，一念之萌。凝神靜觀，勿與欲爭。雲翳既

散，日月自明。窒欲之要，不動亭亭。窒欲箴

懿姚虞之傳心兮，曰惟一以惟精。伊尹憫後覺之未覺兮，非予覺之其誰鳴。衛武公歌有覺之句兮，千載猶播其芳馨。洙泗先覺之是賢兮，此道參前而倚衡。覺賦

衡學講堂更名時習和貳車韻五首

道心無壞亦無成，只怕微雲點太清。重坎之亨人

不識，一輪素月本來明。言習坎之心亨也。

意味澄然未動初，綱常大道本同趨。直須麗澤工

夫熟，便是當年詠舞雩。言兌澤之講習也。

終身不察是凡人，一日三省此身。參也親傳端

的處，品題宜亞。言曾子之傳習也。不違仁。

緬懷周道意悠長，事業姬公念念不忘。宗廟百官誰

識者，仲由也只許升堂。言孔子之習周公也。

莫道今人不古如，分明氣象魯之洙。坤爻六二知

何義，試叩膠庠學易徒。言坤六二之不習無不利也。

【附錄】

授祕書省正字、入對、論君天下不可一日無懼心。今無懼者大端有五、其它禍幾亂萌不可悉數、將何以答天譴、召和氣哉。

知徽州、治先教化、崇學校、訪便民事上之。

知衢州、立旬講、務以理義淑士心、歲撥助養士千緡。

提舉江東常平、所至詣學宮講說、勅書院貴溪之南、以祀象山。

遷祕書少監、入見、帝曰、卿久勞于外、篤志愛民、每覽所陳、備見懇惻、先生奏無逸之義、言知農夫稼穡艱難、自然逸欲之念不起、乞力守更化以來求賢如不及之初意。

嘉熙元年、遷中書舍人、入見、陳心源之說。

遷吏部侍郎兼國子祭酒、日召諸生叩其問學理義講習之益、時邊遽日至、先生條十事、至爲詳明。

真西山序紹定江東荒政錄曰、袁侯在江左五年、

屬州縣無一歲不告饑、侯無一日不講荒政。先儒有言、天于蓄變之將作、必豫出其人以擬之。若侯者、其天之所擬耶。天之爲心、仁而已矣。侯之所爲、亦不失其本心而已。

又爲作眞贊曰、傳絜齋心、得慈湖髓。方寸虛明、燭千里、是爲鄧山子袁子。

王厚齋四明七觀曰、處則講貫以淑艾、(任)(仕)則善教以昌言。長庚曉月、惟楊暨袁。袁亦有子、受業于楊。進禮退義、家學用光。

戴剡源孝經說後序曰、正肅公既貴、嘗持江東憲節、數數爲士大夫講象山之說、故江東之人自正肅公而尊象山之道益嚴。

袁清容書先生懲忿窒慾題扁曰、忿慾皆發之不中節者。易咸以無心爲感、何思何慮、是則安有不正者。漢儒言感物而動、失旨多矣。正肅公謂忿急于剛、以欲爲剛德、不足探本澄源、有合夫繫辭傳



之說。故其平居守身如玉雪。危言讜論。百王交避。其剛之謂也。清齋端居。不避聲色。此絕慾之效也。居朝不一二年。輒以直道去。湯文清哭公之詩有曰。獨留事業在江東。真實錄也。

黃南山先賢正肅袁先生贊曰。巍巍正肅。作聖有功。擢魁嘉定。蹇蹇匪躬。禽鳥春風。予樂攸同。高山景行。允矣儒宗。

梓材謹案。宋史藝文志有先生中庸詳說二卷。經義考云已佚。四庫全書本永樂大典著錄蒙齋中庸講義四卷。提要云。其書備列經文。逐節訓解。蓋平日錄以授門弟子者。中間委曲推闡。往往言之不足。而重言以申之。其學出于慈湖。故立說多與象山相合。如講語大。語小一節云。包羅天地。該括事物。天下不能載者。惟君子能載之。而天下又何以載。幽通鬼神。微入毫髮。天下不能破者。惟君子能破之。而天下又何以破。此即象山語錄所云天下莫能載者。道大無外。若能載。則有分限矣。天下莫能破者。一事一物。纖悉微末。未嘗與道相

離之說也。其講自誠明一節云。誠不可傳。可傳者明。明既性也。不在誠外也。此即象山語錄所云誠則明。明則誠。此非有次第。其理自如此之說也。其他宗旨。大都不出于此。雖主持過當。或不免惛恍無歸。要其心得之處。未嘗不自成一家云。

閣學袁先生商

袁商。正獻季子。官至閣學。與兄肅甫俱有學問。知名于時。姓譜

蒙齋講友

伍先生維寅

伍維寅字清之。衢州人。嘉定十六年擢奉常第。司戶衡州。嘗與袁蒙齋友。蒙齋言其貌莊而和。言平而實。攷其行。鄉閭稱爲佳士。叩其志。沛乎勇決而莫之禦云。袁蒙齋集

絜齋門人

【補】胡先生誼

梓材謹案。先生著有尚書釋疑十卷。經義考云佚。

【附錄】

正之自以不與時偶、益讀古聖哲書、深求旨趣、以自暢適。

晚歲建聚書樓、扁曰觀省、自號觀省佚翁、且作記曰、青嶂當前、翠竿在側、展卷與聖賢對語、優哉游哉。又述絜齋之訓曰、修身爲本、謹行爲先、觀于斯、省于斯、子子孫孫、寶之永無忘。

蒙齋銘其墓曰、癯儒精神、樂哉一貧、是爲絜齋先生之弟子、不辱師門。

【補】胡先生謙

梓材謹案、先生著有易說、易林。魏序上文云、尚慮所見未廣、

介余友袁廣微、將就正于余。甚矣牧之之好學也。似先生嘗

學于鶴山。

【附錄】

魏鶴山序先生易說曰、余謂古之學道雖分古今、越宇宙、而義理之會、若合符節。牧之于余、有未可

強同者、固亦足以交警互發、抑必有一是非于此者矣。邵子曰、先天學、心法也。造化萬物、生于心也。每味其言、先儒之所謂學者、蓋如此、故更願牧之歸而求之、而予亦以是自警焉。

路先生康

路康字子齡、世居河南。父覲、始居象山。先生從學于袁絜齋、絜齋調官江陰、亦從而卒業焉。絜齋集

吳先生炎

吳炎字晦夫、絜齋弟子、絜齋字之。絜齋集

博士李三江先生元白 詳見廣平定川學案

少師程洺水先生秘 別見嶽麓諸儒學案補遺

統領胡先生革

胡革字從之、慈溪人。少從袁正獻學、正獻愛其氣質之純茂、志操之堅確、名之曰諶、字以實之。先生苦心刻意、勇于自立、不得志于儒科、思欲以武奮、遂更其名并字易之、取從革之義、圖通變之功也。



仕爲鎮江府都統司左軍統領。大監慈湖楊公、先生亦嘗親炙誨益、服膺不忘。絮齋集

李先生鶚

附師楊子嘉

李鶚字雄飛、奉化人、家于金溪。師事楊子嘉、既又從沈定川、楊慈湖、袁絮齋學、共學者咸愛敬之。絮齋集

集

汪先生龍友

梓材謹案、先生嘗以父命受業絮齋于永嘉、見其父從事傳、

詳廣平定川學案補遺。

章先生麟

父煥

章麟、慈溪人。其父煥字昭卿、恨少壯時學不竟力、磨厲諸子不少休、平旦盥櫛以躬先之、且命其子皆早起、曰、雞鳴而起、孳孳爲善者、舜之徒也。絮齋授徒里校、俾先生受業焉。絮齋集

張先生伯常

張伯常、龍泉人、與蒙齋友。蒙齋稱其學醇行方、氣

充識明、可以爲師矣。袁蒙齋集

梓材謹案、先生、絮齋有書贈之、勉以發憤力行、又其立志貴

乎恢張、修德莫如就業、蒙齋以爲訓學者、則先生嘗學于絮

齋之門矣。

吳先生祈

吳先生裕 合傳

吳祈、吳裕、鄞人、君若适之二子、而絮齋之甥也。絮齋贈詩以誨之、曰、男兒何所急、爲學要立志。此志苟堅強、天下無難事。超然貴于物、萬善無不備。厥初本高明、有過則昏蔽。但能改其過、輝光照無際。厥初本篤實、有過則虛僞。但能改其過、金玉等精粹。改過貴乎勇、不勇真自棄。有過如坑阱、改過如平地。平地可安行、坑阱宜急避。事親貴乎孝、事長貴乎弟。是爲立身本、奉承無失墜。門戶久益頹、盍作興起計。是心通神明、勿使形體累。持之久而純、爲福如川至。其二曰、農夫力耕耘、歲功必倍收。吾